



TEKS UCAPAN
YANG BERBAHAGIA DATUK HAJI ABANG ABDUL WAHAP BIN HAJI ABANG JULAI
DATUK BANDAR KUCHING UTARA
SEMPENA HARI BANDARAYA KUCHING KE-27
1 OGOS 2015
STADIUM PERPADUAN, PETRA JAYA, KUCHING

Bismillahirrahmanirrahim.....

Assalamualaikum warahmatullahi wabarakatuh dan Salam Sejahtera...

Yang Amat Berhormat Datuk Patinggi Tan Sri (Dr)
Haji Adenan Bin Haji Satem, Ketua Menteri Sarawak serta
Yang Amat Berbahagia Datin Patinggi Dato Hajah Jamilah binti Haji Anu

Yang Berbahagia, rakan saya di MBKS, Dato James Chan Khay Syn,
Datuk Bandar Kuching Selatan

Yang Berhormat Menteri-Menteri / Menteri Muda - Menteri Muda,

Yang Berbahagia Tan Sri-Tan Sri /Puan Sri-Puan Sri/Datuk-Datuk/
Datin-Datin,

Ketua-Ketua Jabatan

Ahli-Ahli Dewan DBKU

Counselor-Counselor MBKS

Ketua-Ketua Masyarakat

Pegawai Kanan DBKU dan MBKS

Para wartawan

Tuan-tuan dan Puan-puan yang dihormati sekalian..

1. Alhamdulillah, marilah kita memanjat kesyukuran kehadiran Allah S.W.T. kerana dengan limpah kurnia dan izinNya jua, maka kita dapat bersua lagi dalam Majlis Memperingati Hari Bandaraya yang ke-27 pada pagi yang mulia ini.
2. Terlebih dahulu, saya ingin merakamkan setinggi penghargaan kepada Yang Amat Berhormat Datuk Patinggi Tan Sri (Dr) Haji Adenan Bin Haji Satem, Ketua Menteri yang kita sanjungi, serta Yang Amat Berbahagia Datin Patinggi Dato Hajah Jamilah Binti Haji Anu kerana sudi hadir bersama-sama kita dalam majlis pada pagi ini. Kehadiran Yang Amat Berhormat Datuk Patinggi Tan Sri serta isteri jelas menunjukkan komitmen dan sokongan ke atas usaha kedua-dua bandar raya (utara dan selatan) dalam membangun infrastruktur bandar raya dan memberi perkhidmatan kepada wargakota semua. Secara langsung ianya juga menyemarakkan semangat kami, warga pentadbir bandar raya, untuk terus berusaha menyempurnakan fungsi dan peranan masing-masing dengan cemerlangnya.
3. Majlis Memperingati Hari Bandar raya yang diadakan pada setiap tahun tanpa gagal sejak 27 tahun yang lalu iaitu bermula tahun 1988 juga tanpa gagal dihadiri oleh Yang Amat Berhormat Ketua Menteri. Ini menunjukkan betapa pentingnya majlis seperti ini diadakan secara konsisten pada setiap tahun sesuai dengan peranannya menzahirkan detik penting dalam sejarah Bandaraya Kuching selain sebagai tanda bermulanya aktiviti Pesta Kuching yang akan diadakan di sepanjang bulan ogos.

Yang Berbahagia Tan Sri/Puan Sri/ Datuk-Datuk /Datin-Datin dan Hadirin sekalian,

4. Pada tahun ini Bandaraya Kuching akan dinobatkan sebagai Bandaraya Perpaduan yang mana akan dizahirkan perisytiharannya oleh Yang Amat Berhormat Ketua Menteri sebentar sahaja lagi. Penzahiran sebagai **Bandaraya Perpaduan** ini amat signifikan dalam era kini mengambilkira masyarakat ketika ini sedang mengalami suatu macam kekalutan yang ditimbulkan oleh bermacam pengaruh yang datangnya dari pelbagai penjuru dunia yang tanpa sempadan. Secara fitrahnya, masyarakat sebenarnya menuntut keamanan dan perpaduan bukan persengketaan. Fitrah semula jadi manusia pula inginkan kehidupan yang aman damai kerana di situ letaknya kebahagiaan dan keharmonian yang diidamkan oleh semua manusia.
5. Manusia juga tidak inginkan keadaan berpecah belah, saling serang menyerang dan saling berusaha menghancurkan antara satu sama lain. Memang tidak dinafikan, untuk mempunyai pendapat dan fikiran yang sama bagi semua orang tidak mungkin terjadi tetapi untuk bersatu pasti tiada halangan, asalkan semua pihak bersikap jujur pada diri sendiri dan menghormati orang lain. Sikap jujur, toleransi dan menghormati orang lain merupakan sikap yang berupaya membawa kepada kejernihan hubungan, sekali gus memantapkan penyatuan masyarakat bagi menangani segala macam bentuk permasalahan yang datangnya sama ada daripada kalangan masyarakat itu sendiri mahupun dari dunia luar.

6. Dalam konteks islam, perpaduan masyarakat adalah selaras dengan firman Allah SWT dalam Surah Ali-Imran: Ayat 103:

بِسْمِ اللَّهِ الرَّحْمَنِ الرَّحِيمِ
وَاعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا

yang bermaksud:

“Dan berpegang teguhlah kamu semuanya kepada tali (agama) Allah dan janganlah kamu bercerai berai”.

Islam juga melihat Perpaduan ini dalam dua dimensi iaitu:-

Pertama: Perpaduan Luaran - yang terjelas sebagai kerukunan muafakat, bergotong-royong, memperteguh suasana ukhuwah wargakota demi kepentingan bersama; dan

Kedua: Perpaduan Dalaman - yang jauh lebih asas iaitu kesatuan dalaman yang terzahir sebagai pautan kejiwaan dan kerohanian.

Justeru itu, keteguhan dan keutuhan masyarakat sangat ditagih dalam konsep perpaduan kerana kejayaan dan kecemerlangan sesebuah bandar raya terletak kepada perpaduan di kalangan warga kotanya. Begitu juga sebaliknya, perpecahan adalah punca kejatuhan dan kemusnahan. Sehubungan dengan itu, asas-asas kepada perpaduan mestilah dijana dengan pelbagai gerakan ke arah perpaduan selain perlu dirintis supaya hasrat untuk membentuk sebuah bandaraya yang cemerlang dapat direalisasikan.

Ini mengambilkira sesebuah bandar raya lazimnya dihuni oleh masyarakat pelbagai ras dan agama yang tidak dapat tidak perlu meletakkan perpaduan sebagai keutamaan yang tinggi untuk membentuk bandaraya yang aman dan harmoni kerana perpaduan ialah jaminan (insurans) kemakmuran, keselamatan dan kemajuan bandaraya.

Yang Berbahagia Tan Sri/Puan Sri/ Datuk-Datuk /Datin-Datin dan Hadirin sekalian,

7. Seajar dengan matlamat ke arah **Bandaraya Perpaduan** ini, DBKU akan berusaha mempertingkatkan lagi keupayaan dan komitmen melalui perlaksanaan serta pemantapan ke atas Pelan Penambahbaikan CBS (Cantik, Bersih, Selamat) yang telah pun dilaksana bermula tahun 2013 dan akan sampai ke kemuncaknya pada tahun 2017. Pelan 5 Tahun inilah merupakan landasan utama untuk kami merencanakan sebarang inisiatif dan tindakan dalam membangunkan bandar raya keseluruhannya khususnya ke arah **Bandaraya Perpaduan**. Alhamdulillah, setakat ini, pencapaian ke atas pelan ini adalah menggalakan dengan terlaksananya inisiatif-inisiatif yang telah digariskan ke arah bandaraya popular di rantau Asia pada tahun 2017 selain sebagai sebuah bandaraya yang mempunyai Jiwa (*A City with a Soul*) yang turut menekankan elemen perpaduan dalam setiap tindakan. Perpaduan di sini merujuk kepada usahasama dan kolaborasi antara '3P' iaitu *People, Public and Private*. Adalah dijangka bahawa pelan tersebut dapat mencapai matlamatnya pada tahun 2017 dengan jayanya berdasarkan kepada komitmen, kerjasama dan perpaduan seperti yang dimaksudkan tadi.

8. Antara perkara utama yang terhasil dari usaha perpaduan '3P' tadi adalah seperti:-

- a) Program Kitar Semula melalui *Programme 3R Buy Back* dan *Programme Home Composting* menggunakan teknologi *EM Bokashi* yang mana telah memberi manfaat *Trash To Cash* kepada komuniti yang semakin mendapat sambutan wargakota. Selain itu, DBKU bersama komuniti mengusahakan kawasan terbuka serta terbiar sebagai Kebun Komuniti atau *Community Farming* di mana usaha ini boleh meningkatkan ekonomi komuniti setempat.
- b) DBKU Ronda dan DBKU Bantu melalui Pusat Khidmat 24 Jam pula sentiasa bersiap sedia menerima panggilan daripada wargakota dan membantu mereka tanpa mengira waktu. Sementara, melalui Sistem Zoning yang diterajui oleh 28 orang Pegawai Zon yang terdiri dari staf DBKU pula memudahkan DBKU dan masyarakat kampung berhubung dan berbincang secara lebih menjurus dalam menangani isu-isu setempat. Semua usaha ini merupakan agenda kami untuk mendekati warga Bandaraya Kuching agar kami sentiasa di hati masyarakat dan kehadiran kami dirasai. ***We always want to be seen and felt by the community.***
- c) Inisiatif *Empowerment* kepada komuniti setempat untuk melakukan kerja-kerja kontrak pula bagi memperkasakan penglibatan komuniti selain menyemai semangat perpaduan dan kepunyaan komuniti keatas kawasan yang diselenggara. Antaranya adalah kontrak Pembersihan Pasar Sungai

Maong dan Pengutipan Sampah di Kampung Bako dan yang terkini kontrak Kerja Pemotongan Rumput dan Pembersihan Parit bagi kawasan Kejiranan Mesra DBKU iaitu Kampung Boyan Gersik & Surabaya (BGS), Kampung Bako dan Kampung Sungai Bedil. In Sha Allah.... ianya akan diteruskan ke kampung-kampung lain pada masa akan datang untuk tujuan yang sama selain menjana pendapatan atau ekonomi komuniti setempat.

- d) Pemindahan Pasar Minggu dan Benteng Satok ke Medan Niaga Jalan Matang iaitu merupakan kolaborasi DBKU dengan pihak FAMA. Ianya berjaya menyediakan tempat berniaga yang lebih selesa kepada penjaja hujung minggu dan penjaja harian yang terlibat.
- e) *Smart partnership* dibuat dengan pihak swasta, E-Mart Express dalam mengurus dan membangunkan semula Pusat Niaga Sukma Ria dan Demak Laut. Hasilnya selain dari penjimatan kos penyelenggaraan sebanyak RM350,000.00 setahun, kami juga berjaya menjana pendapatan dari sewa sebanyak RM260,000.00 setahun.
- f) *Smart partnership* juga dibuat dengan syarikat swasta dalam perlaksanaan pelbagai jenis media pengiklanan seperti *Pillar Wrap* dan *Lighted Box* dengan Syarikat Ladang Kubah manakala *LED Animated Box* dengan Syarikat Wijasa Media Sdn. Bhd. Perlaksanaan dibuat tanpa kos iaitu melalui konsep *Concessionaire* dan telah menjanakan hasil sebanyak RM500,000.00 setahun.

Usaha-usaha ini akan sentiasa diteruskan serta dimantapkan dari masa ke semasa untuk mendapatkan penglibatan yang lebih menyeluruh selain menekankan elemen perpaduan dalam tindakan.

Yang Berbahagia Tan Sri/Puan Sri/ Datuk-Datuk /Datin-Datin dan Hadirin sekalian,

9. Berbalik kepada majlis pada hari ini, majlis yang dianjurkan secara bersama antara DBKU dan MBKS ini juga akan menyajikan pelbagai aktiviti menarik bermula bulan ogos ini sehingga hujung tahun ini yang sesuai untuk dimanfaatkan oleh semua peringkat masyarakat tidak kira bangsa dan agama. Untuk DBKU, antara aktiviti utama yang dirangka adalah:-

- Pesta Macam-macam Laksa yang diadakan pada hari ini di perkarangan tempat letak kereta Stadium Perpaduan ini yang akan menghidangkan pelbagai jenis laksa seperti Laksa Sarawak, Laksa Penang, Laksa Johor dan banyak lagi.
- *2nd International City With A Soul Conference* pada 4 dan 5 September 2015.
- *3rd International Orchid Show* pada 17 September 2015.
- *International Drum Festival* pada 27 hingga 29 November 2015.

10. Program- program yang lain adalah :-

- *International Cat Show*
- *International Dart Competition*
- *I Luv Kuching City*
- Pengucapan Puisi Hari Bandaraya, dan banyak lagi.

Dengan ini saya menjemput semua warga kota untuk menyaksikan dan menyertai aktiviti - aktiviti ini nanti.

11. Sebelum saya mengakhiri ucapan ini, sekali lagi sekalung penghargaan buat Tetamu Kehormat kita Yang Amat Berhormat Datuk Patinggi Tan Sri Ketua Menteri serta isteri di atas kesudian hadir ke majlis pagi ini. Kehadiran Yang Amat Berhormat Datuk Patinggi Tan Sri serta isteri amat bermakna kepada kami.
12. Dengan kesempatan ini juga, saya ingin merakamkan setinggi penghargaan dan terima kasih kepada semua yang terlibat – agensi kerajaan, swasta, NGO dan para penaja yang telah turut serta dalam menjayakan Majlis Memperingati Hari Bandaraya ke-27 tahun ini, semua media cetak dan elektronik yang sentiasa memberi kerjasama menghebahkan aktiviti Hari Bandaraya. Harapan saya kerjasama seperti ini dapat kita kekalkan secara berterusan di masa-masa akan datang.
13. *I would also like to place on record my sincere appreciation for the very good DBKU/MBKS co-operation and spirit of oneness in untiringly providing all the services for the citizens of Kuching. It is my fervent hope that we can continue working together in this smart partnership and with citizen engagement, ensure that the city of Kuching will progress into a Liveable and Vibrant City of Choice.*

14. Akhir kata, terimalah serangkap pantun dari saya.....

Petang hari pergi ke pekan,
Pergi bersiar menaiki kereta;
Perpaduan wargakota perlu dimantapkan,
Demi kesejahteraan bandaraya kita.

Sekian.....

Wabillahitaufig walhidayah wassalamu alaikum warahmatullahi
wabarakatuh.....